



Broj: 01/1-50-1-13/07
Sarajevo: 14.05.2007.

Z A P I S N I K

sa 13. sjednice Ustavnopravne komisije

Sjednica je održana 14.05.2007. godine s početkom u 10,00 sati.

Sjednici su prisustvovali svi članovi Komisije: **Šefik Džaferović, Drago Kalabić, Lazar Prodanović, Halid Genjac, Momčilo Novaković, Ekrem Ajanović, Martin Raguž, Velimir Jukić i Adem Huskić.**

Pored članova komisije sjednici su prisustvovali: Branka Todorović – Sekretar Predstavničkog doma PSBiH; u ime Vijeća ministara BiH Esmā Hadžagić - Ministarstvo civilnih poslova; ispred Visokog sudskog i tužilačkog vijeća BiH: Branko Perić – predsjednik visokog sudskog i tužilačkog vijeća BiH i Aldijana Porča; Suad Salkić - OSCE; Alma Smajlović – OSCE ; Gordana Ivanović - OSCE; Nada Zukić – OHR; , Maja Ribar - OHR; Daria Duilović – OHR; i Jadranka Mikić EC.

Sjednici je prisustvovao Milan Zjajić, koji je obavljao poslove sekretara Komisije, pripravnik Đenita Pašić zaposlena u Sekretarijatu PS BiH i student stažista Ajdin Brčaninović.

Sjednica je završena u 19,00 sati.

Nakon što je Predsjedavajući Komisije predložio dnevni red, član Komisije Lazar Prodanović je istakao da nije dobio sve zapisnike, nakon čega je verificiranje zapisnika odgođeno za narednu sjednicu. Komisija je jednoglasno prihvatila sljedeći dnevni red:

D N E V N I R E D :

1. Izvještaj Visokog sudskog i tužilačkog vijeća Bosne i Hercegovine za 2006. godinu;
2. Prijedlog zakona o visokom obrazovanju u BiH, predlađač Vijeće ministara BiH, po zaključku Doma sa 5. sjednice od 15.3.2007., odgođeno sa 12.sjednice 27.04.07.;
3. Prijedlog zakona o Agenciji za predškolsko, osnovno i srednje obrazovanje u BiH, predlađač Vijeće ministara BiH; odgođeno sa 12.sjednice 27.04.07.;
4. Ostala pitanja.

Ad. 1. Izvještaj Visokog sudskog i tužilačkog vijeća Bosne i Hercegovine za 2006. godinu;

Nakon provedene rasprave u kojoj su učestvovali svi članovi Komisije i Predsjednik Visokog sudskog i tužilačkog vijeća BiH, Komisija je:

- a) konstatovala da je Izvještaj metodološki dobro urađen te da može služiti kao osnov za daljnje korake koje trebaju poduzimati ostali organi u reformi pravosuđa;
- b) u skladu sa Zakonom o Visokom sudskom i tužilačkom vijeću Bosne i Hercegovine. ("Službeni glasnik BiH", broj 25/04 i 93/05) prima izvještaj na znanje te to isto predlaže i Predstavničkom domu Parlamentarne skupštine Bosne i Hercegovine;
- c) naglašava posebnu pažnju na saradnju Predstavničkog doma Parlamentarne skupštine Bosne i Hercegovine i Visokog sudskog i tužilačkog vijeća BiH u cilju jačanja uloge Visokog sudskog i tužilačkog Vijeća kao odgovornog tijela u osiguranju principa nezavisnosti i odgovornosti pravosuđa u BiH.

Ad. 2. Prijedlog zakona o visokom obrazovanju u BiH, predlađač Vijeće ministara BiH, po zaključku Doma sa 5. sjednice od 15.3.2007., odgođeno sa 12.sjednice 27.04.07.;

Komisija je vodila iscrpnu i dugotrajnu raspravu o ulozenim amandmanima te je konstatovala da su amandmane uložili Selim Bešliagić, Drago Kalabić, Martin Raguž i Šefik Džaferović. Prilikom glasanja Martin Raguž i Drago Kalabić su odustajali od nekih amandmana, a neke su modifikovali.

Nakon provedenog glasanja Komisija je usvojila sljedeće amandmane:

AMANDMAN I

Naziv zakona treba da glasi: „OKVIRNI ZAKON O VISOKOM OBRAZOVANJU U BOSNI I HERCEGOVINI“

AMANDMAN II

U članu 4., iza stava 1. dodaje se stav 2. koji glasi:

“Visoko obrazovanje se temelji na:

- akademskim slobodama, akademskoj samoupravi i autonomiji univerziteta,
- otvorenosti univerziteta prema javnosti, građanima i lokalnoj zajednici,
- nedjeljivosti nastavnog rada i naučnog istraživanja, odnosno umjetničkog stvaralaštva,
- uvažavanje evropskih humanističkih, demokratskih vrijednosti, te usklađivanja sa evropskim sistemom visokog obrazovanja,
- poštovanje ljudskih prava i građanskih sloboda, uključujući zabranu svih vidova diskriminacije,
- konceptu cjeloživotnog obrazovanja,
- interakciji sa društvenom zajednicom i obavezi univerziteta da razviju društvenu odgovornost studenata i drugih članova akademske zajednice”.

AMANDMAN III

U članu 10. u stavu 1. alineja 2. mijenja se i glasi:

"- odnosi se na visokoškolsku ustanovu koja realizuje najmanje pet različitih studijskih programa iz najmanje tri naučne oblasti - prirodne nauke, tehničke nauke, biomedicina i zdravstvo, biotehničke nauke, društvene nauke i humanističke nauke.

Alineja 4. mijenja se i glasi:

“ – odnosi se na visokoškolsku ustanovu koja realizuje najmanje jedan studijski program iz jedne naučne oblasti i ispunjava druge uslove u skladu sa zakonom”.

AMANDMAN IV

U članu 19. stav 1. dodaje se alineja koja glasi:

- sklapa ugovorne odnose s privrednim subjektima o javno-privatnom partnerstvu.

AMANDMAN V

U članu 21. dodaje se stav 3. koji glasi:

"Naučnoistraživački rad na visokoškolskim ustanovama može se sufinansirati iz sredstava Budžeta institucija BiH i međunarodnih obaveza BiH, u skladu sa važećim propisima na državnom nivou."

AMANDMAN VI

Zadnja alineja člana 45. mijenja se i glasi;

" U skladu sa Lisabonskom konvencijom i njenim pratećim dokumentima, donosi preporuke nadležnim obrazovnim vlastima u entitetima, kantonima i Brčko Distriktu BiH o priznavanju diploma stečenih van BiH sa ciljem zaposlenja, nastavka obrazovanja i ostavriavanja drugih prava koja proističu iz stečene kvalifikacije."

AMANDMAN VII

Član 48. mijenja se i glasi:

"Član 48.

Agencija je nadležna da:

- utvrđuje jasne, transparentne i pristupačne kriterije za akreditaciju visokoškolskih ustanova i donosi norme kojima se određuju minimalni standardi u oblasti visokog obrazovanja;
- utvrđuje kriterije za izbor domaćih i međunarodnih stručnjaka koji obavljaju ocjenu i reviziju kvaliteta i koji daju preporuke o akreditaciji visokoškolskih ustanova;
- preporučuje kriterije i standarde nadležnim obrazovnim vlastima u entitetima, kantonima i Brčko Distriktu BiH za osnivanje i zatvaranje visokoškolskih ustanova, te za prestruktuisanje studijskih programa;
- preporučuje kriterije za licenciranje visokoškolskih ustanova i studijskih programa;
- daje preporuke o najnižim školarinama za sve studente na akreditovanim visokoškolskim ustanovama, s ciljem da najniže školarine budu usklađene u cijeloj BiH;
- pruža savjete o politici rada i razvoja nadležnim obrazovnim vlastima u entitetima, kantonima i Brčko Distriktu BiH;
- daje savjete i informacije o pitanjima unutar svoje nadležnosti zainteresovanim strankama;
- utvrđuje standarde kvaliteta, analizira kvalitet, daje preporuke za otklanjanje nedostataka kvaliteta studija i visokoškolskih ustanova;

- predstavlja BiH u međunarodnim organizacijama za kvalitet u visokom obrazovanju;
- predlaže opšte smjernice i kriterije na osnovu kojih se iz Budžeta institucija BiH mogu dodjeljivati sredstva visokoškolskim ustanovama za naučnoistraživački rad;
- donosi pravilnike i druge akte iz svoje nadležnosti."

AMANDMAN VIII

Nadnaslov i član 49. mijenjaju se i glase:

"4.1. Akreditacija visokoškolskih ustanova

Član 49.

U oblasti akreditacije Agencija je nadležna da:

- raspisuje javni konkurs za izbor domaćih i međunarodnih eksperata za ocjenjivanje i reviziju kvaliteta i davanje preporuka o akreditaciji visokoškolskih ustanova, odnosno njihovih studijskih programa (dalje: eksperti);
- formira Komisiju za utvrđivanje liste eksperata koji zadovoljavaju kriterije iz člana 48. alineja 2. ovog zakona. Komisija ima pet članova, a čini je po jedan predstavnik Rektorske konferencije BiH, jednog kantonalnog i oba entitetska ministarstava nadležna za obrazovanje, te predstavnik Agencije;
- utvrđenu listu eksperata dostavi na usvajanje svim ministarstvima obrazovanja u BiH i nadležnom odjelu Brčko Distrikta BiH;
- na osnovu prijedloga nadležnih obrazovnih vlasti u pogledu izbora eksperata sa utvrđene liste eksperata, imenuje ekspertske komisije;
- na osnovu mišljenja ekspertske komisije daje preporuku nadležnim obrazovnim vlastima o akreditaciji visokoškolske ustanove, odnosno studijskog programa;
- Postupak i rješenje o akreditaciji i licenciranju visokoškolskih ustanova donose nadležne obrazovne vlasti u entitetima, kantonima i Brčko Distrikta BiH u skladu sa alinejom 1. člana 48. ovog zakona.
- ocjenjuje usklađenost rješenja o akreditaciji sa normama i kriterijumima iz člana 48. alineja jedan ovog zakona i u slučaju utvrđene neusklađenosti daje preporuku Upravnom odboru za preduzimanje daljih mjera, sve do mjere poništenja rješenja o akreditaciji. Žalbu na rješenje o poništenju rješenja o akreditaciji nadležne obrazovne vlasti podnose Upravnom odboru Agencije;
- vodi državni registar akreditovanih visokoškolskih ustanova;
- listu akreditovanih visokoškolskih ustanova u BiH drži stalno na svojoj internet stranici i objavljuje je najmanje jednom godišnje u "Službenom glasniku BiH", a najmanje dva puta godišnje u tri visokotiražne dnevne novine."

AMANDMAN IX

Nadnaslov i član 50. se mijenjaju i glase:

" 4.2. Forma i sadržaj diplome i dodatak diplomi

Član 50.

Agencija donosi uputstvo sa obrascima o formi i sadržaju diplome i dodatka diplome koju izdaju akreditovane visokoškolske ustanove“.

AMANDMAN X

Član 51. se briše, a numeracija članova koji slijede se mijenja, prilagođava ovoj promjeni.

AMANDMAN XI

U članu 52. stavu 4. riječi: “Upravni odbor Agencije” mijenjaju se riječima: “Vijeće ministara BiH”

U stavu 9. riječi "biraju se” mijenjaju se riječima: “bira Parlamentarna skupština BiH”

U stavu 10. riječi "jedna trećina" mijenjaju se riječima: "dvije trećine"

AMANDMAN XII

U članu 61. u stavu 3. riječi: " najkasnije do 1.10.2006. godine" mijenjaju riječima: "u roku od jedne godine od stupanja na snagu ovog zakona."

AMANDMAN XIII

Član 62. mijenja se i glasi:

"Postojeće visokoškolske ustanove stupanjem na snagu ovog zakona dobijaju privremenu akreditaciju od nadležne institucije. U privremenoj akreditaciji određuje se u kom roku će se obaviti akreditacija svakog od pojedinih programa koji se izučavaju na tim visokoškolskim ustanovama, u skladu s kriterijumima i procedurama akreditacije i standardima.

Akreditacija visokoškolskih ustanova obaviće se u periodu od najviše dvije godine od dana stupanja na snagu ovog zakona."

AMANDMAN XIV

U članu 65. u stavu 1. riječi: "do početka 2006/2007 akademske godine" se mijenjaju riječima: "u roku od 90 dana od dana stupanja na snagu ovog zakona."

* * *

Zatim je Komisija sa četiri glasa "za", bez glasova "protiv" i sa pet "uzdržanih", prostom većinom usvojila Prijedlog zakona o visokom obrazovanju u Bosni i Hercegovini sa usvojenim amandmanima

Komisija je konstatovala da je predloženi zakon neophodno donijeti.

Ad. 3. Prijedlog zakona o Agenciji za predškolsko, osnovno i srednje obrazovanje u BiH, predlagač Vijeće ministara BiH, odgođeno sa 12.sjednice 27.04.07.;

Glasanjem je odlučeno da se ova tačka dnevnog reda odgodi za sljedeću sjednicu.

Ad. 4. Ostala pitanja.

Kako nije bilo drugih pitanja po ovoj tački dnevnog reda Predsjedavajući je u 19,00 sati zaključio 13. sjednicu.

SEKRETAR KOMISIJE

Milan Zjajić

PREDSJEDAVAJUĆI KOMISIJE

Šefik Džaferović